



Cybermobbing

Fegl d'infurmaziun per autoritads da scola, per direcziuns da scola e per persunas d'instrucziun

November 2013

Uffants e giuvenils èn per il solit sulets, sch'els vegnan confruntads cun cybermobbing. Ord vista da las victimas manca savens ina persuna da confidenza ubain la pussaivladad da sa drizzar ad in post spezialisà. Er ils uffants e giuvenils che observan tals surpassaments sa sentan malsegirs e perclitads, sche singulas scolaras e singuls scolars han ina tala pussanza e fan mobing senza vegnir impeditids.

Perquai èsi impurtant da far attents ils uffants ed ils giuvenils ch'i dat en il chantun Grischun posts spezialisads directamain accessibels per persunas pertutgadas da cybermobbing e che quests posts porschan en tut il chantun in sostegn fidà e svelt a las victimas ed a lur conturns.

Las explicaziuns qua sutwart duain servir a la scola populara sco emprima orientaziun e sco instrucziun per agir en cas concrets. Tgi che vul s'occupar detagliadament cun la tematica, resguarda per plaschair las infurmaziuns a la fin da quest fegl d'infurmaziun.

Definiziun da cybermobbing

Sut cybermobbing vegn chapì in cumportament aggressiv che fa diever da las furmas da comunicaziun electronicas (p.ex. SMS, internet) e che vegn drizzà repetidamain d'ina u da pliras persunas cunter ina victima cun l'intenziun da far donn a quella.

Cybermobbing po survegnir dimensiuns gravantas: Ils cuntegns sa derasan svelt e penetreschan en la sfera privata da las persunas pertutgadas. Las delinquentas ed ils delinquenti pensan d'agir en moda anonima. Il public è malsurvesaivel. Qua tras vegn potenzià l'effect. Chaussas offendentias stattan savens enavos durant in temp pli lung.

En var nov da diesch cas da cybermobbing èn las victimas stadas confruntadas l'emprim cun mobing tradiziunal. Cun las persunas pertutgadas vegni fatg supplementarmain mobing sur las medias electronicas.

Furmas da cybermobbing

- Trametter insultas per SMS a la victima u trametter mails circulars e communicaziuns cun cuntegns nauschs u turpegius a blers adressats (p.ex. sur WhatsApp)
- Betg laschar entrar insatgi en ina gruppera (p.ex. en Facebook)
- Metter en l'internet fotografias falsifitgadas u peniblas
- Fotografar u filmar situaziuns degradantas e derasar quellas en l'internet
- Fundar "gruppas d'odi" en Facebook u en autres raits, nua che la victima vegn ridiculisada
- Preschentiar la victima en moda negativa en in fauss profil (profil da fake)
- Publitgar sut il num da la victima insultas envers terzas persunas u fauss inserats da contact

Cybermobing en scola e consequenzas pussaivlas

Tgi ch'è suttamess a cybermobing, ha savens gronda tema e schizunt traumas. Resultar pon er consequenzas socialas, corporalas e psichicas negativas.

Consequenzas psichicas pon esser: gnervusitad, disturbis dal sien, temas, depressiuns e letargia. Bleras victimas pateschan er da mals corporals (tranter auter stancladad, disturbis da la digestiun e problems cun il dies). Ils uffants e giuvenils pertutgads sa retiran da lur relaziuns socialas ed èn exponids ad ina ristga pli gronda da pensar ad in suicidi.

Las consequenzas da cybermobing preoccupan las victimas er anc blers onns pli tard. Ditg suenter pon las personas pertutgadas anc patir da temas, da depressiuns, d'ina pitschna conscienza da sasez e d'ina forza da resistenza psichica e corporala reducida.

Co pon ins reagir en cas da cybermobing?

Sustegn da las victimas

Ina victima da cybermobing po sezza, u cun il sustegn d'ina persuna d'instrucziun resp. dals geniturs, contactar ina persuna spezialisada. Per far quest pass dovran victimas giuvenilas savens l'accumpagnament d'ina persuna crescida che stat datiers ad ellas e che ha in tschert sensori. Igl è impurtant che las victimas sappian il suandard: Sch'ina persuna spezialisada vegn contactada, vegn quai tractà en moda confidenziala, ed ulteriurs pass vegnan fatgs mo cun il consentiment da la victima. Il princip è quel da prender serius las agressiuns e d'agir svelt, senza che la victima vegnia danovamain en ina situaziun da flaivlezza u da nunpußanza.

Ensemen cun la victima e cun ils geniturs duai la persuna spezialisada sclerir conscienuziamain, sch'igl è d'instradar pass giuridics resp. da clamar la polizia.

Ulteriurs pass

Tut tenor la situaziun poi esser impurtant da far ulteriurs pass en enclegentscha cun la victima, cun ils geniturs u las persunas responsablas per l'educaziun, cun persunas spezialisadas e cun la scola:

- reabilitaziun da la victima (sustegnair l'integritad psichica durant in temp pli lung)
- intervenziuns en scola (p.ex. discurs, intervenziun en las classas, tematisar cybermobing en l'instrucziun, project da scola)
- sancziuns pedagogicamain adequatas cunter las delinquentas ed ils delinquents (p.ex. discurs cun persunas spezialisadas, time out, transferiment en in'autra classa, engaschaments da lavur)
- tematisar resp. pussibilitar furmaz d'indemnisaziun en enclegentscha cun la victima

Vart giuridica e tecnica

Er per uffants e giuvenils vala: L'internet n'è betg in spazi senza dretg. Violaziuns da l'onur, smanatschas e columnias èn chastiablas. Las disposiziuns centralas respectivas sa chattan en il cudesch penal svizzer (art. 135 e 197). Sin proposta da la victima pon questi delicts vegnir persequitads penalmain.

Per las investigaziuns penales èsi decisiv da salvar material da cumprova. Per quest intent dovra la polizia copias electronicas dad SMS, da maletgs (p.ex. cun agid da "print screens"), dad e-mails e d'autras notizias.

Uschenavant sco pussaivel duain cuntegns offendents vegnir stizzads svelt en l'internet, ed ils gestiunaris da las raits socialas duain vegnir rendids attents a tals cas. Displaschaivlamain èsi fitg difficil da stizzar cuntegns en la rait dal tuttafatg.

Persunas d'instrucziun sco victimas da cybermobing

Er persunas d'instrucziun pon daventar victimas da cybermobing. In sustegn svelt per questa grupperia da victimas è gist uschè impurtant. Star a disposiziun stattan ils medems posts spezialisads sco per uffants e giuvenils.

Prevenziun

In clima da scola senza tema, collià cun acceptanza vicendaivla e cun cleras reglas, è ina premissa centrala per prevegnir a violenza da tut gener.

Las rollas da delinquentes e da victimas da cybercriminalitat sa cuvran fermemain cun las rollas existentes da delinquentes e da victimas. En quest regard è cybermobing savens in spustament dal mobing convenziunal. Perquai po cybermobing veginr impedì tras ina tenuta attenta e cuminaivla, nua che naginas furmas da mobing na veginan toleradas da vart da naginas persunas participadas.

Cuntegns concrets da la prevenziun:

- Ir enturn cun mobing e tenuta envers mobing en scola
- Scleriment da las ristgas en l'internet, strategias per la segirezza da l'intent resp. basas giuridicas
- Promozion interdisciplinara da las cumpetenzas socialas e da las cumpetenzas da medias

Cun tematisar il cybermobing en l'instrucziun, en projects, en furmaziuns supplementaras da las persunas d'instrucziun ed a chaschun d'occurrenzas da geniturs duain veginr sensibilisads ils uffants, ils giuvenils e las persunas creschidas.

Mobing po veginr constatà a temp grazia ad in barat avert tranter la scola ed ils geniturs. Il cumbat cunter mobing premetta da princip ch'ils posts spezialisads involvids collavurian optimalmain.

Posts da consultaziun

Servetsch psicologic da scola dal chantun Grischun (SPS):

Per mintga scola e per mintga scolara e scolar stat a disposiziun per quest intent en tut las regiuns dal chantun ina persuna spezialisada scolada, e quai gratuitamain ed anonimamain. Datas da contact: Posts regiunals dal SPS u sur il secretariat da glindesdi fin venderdi (telefon 081 257 27 42).

Lavur sociala da scola:

Nua ch'ina lavurer u in lavurer social da scola è avant maun, po quella u quel porscher sustegn.

Ulteriurs posts da consultaziun, tut tenor la situaziun (grevezza dal cas da mobing, aspects penals):

Polizia chantunala dal Grischun (servetsch da giuvenils)

Psichiatria d'uffants e da giuvenils dal Grischun, psicoterapeutas e psicoterapeuts

Ulteriuras infurmaziuns

Sin la pagina d'internet da l'uffizi per la scola populara ed il sport chattan ins indicaziuns da litteratura, links utils sco er in fegl sgulant che po veginr consegnà als uffants e giuvenils.

[> Rumantsch > Servetsch psicologic da scola > Documents](http://www.av.sch.ch)